

2 da matg 2023

## Communicaziun a las medias

# Premi da federalissem 2023: las finalistas ed ils finalists

**Per il Premi da federalissem 2023 èn vegnidas inoltradas tantas candidaturas sco anc mai. Ils 51 dossiers èn in dumber degn per festivar ses dieschavel anniversari. La giuria ha decidì da metter quest onn l'accent sin las candidaturas che promovon la convivenza e la coesiun naziunala en Svizra. Il num da la victura u dal victur vegn communitgà l'entschatta da zercladur.**

L'onn passà aveva la giuria mess il focus sin las linguas: tut ils projects finalists avevan ina colliaziun cun la plurilinguitad. Gudagnà il premi ha la finala il Forum per l'italiano. Quest onn èn vegnids inoltrads 51 dossiers da tut las regions linguisticas. La gronda part da las candidaturas ha in profil naziunal e vegn dals secturs cultura e furmaziun. La coesiun naziunala è stada in punct da discussiun impurtant en la giuria. Suenter ina debatta intensiva ha ella nominà las finalistas ed ils finalists dal premi.

### La preselecziun per il Premi da federalissem 2023:

- [Associazion per promover l'instrucziun plurilingua en Svizra \(APEPS\)](#): la finamira da l'APEPS è da sviluppar e da megliar las cumpetenzas linguisticas da las scolaras e dals scolars cun models d'emprender bilings u plurilings che promovon il barat e la chapientscha tranter las regions.
- [Bibliomedia Suisse](#): la fundaziun promova per incumbensa da la Confederaziun il svilup da las bibliotecas cun metter a disposiziun ina vasta paletta da medias en differentas linguas. Ella elavura era purschidas per promover la lectura.
- [Campus per la democrazia](#): la plattafurma da la Fundaziun Dialog reunescha personas da la pratica e da la scienza per promover la furmaziun e la participaziun politica dad uffants, giuvenils e creschids. Sia finamira è da nizzegiar las sinergias, parter la savida e crear ina vasta rait d'acturas e d'acturs.
- [Constitutio](#): l'iniziativa vul dar ina fatscha als 195 artigels da la Constituziun federala svizra cun filmar personas enconuschentas e nunenconuschentas che legian extracts da quella. I sa tracta d'in project sociopolitic multimedial. L'idea è da dar dapli visibladad a la Constituziun ch'è la pitga da la democrazia svizra.

- [Éditions d'en bas](#) e ses directur Jean Richard: dapi sia fundaziun l'onni 1976 promova la chasa editura culturalas marginalas e novas perspectivas en la cuntrada litterara, sociala e politica svizra, surtut cun la translaziun da texts d'auturas e d'auturs svizzers.

- [Gesichter der Erinnerung](#): la plattafurma participativa, fundada il 2020, porta a la glisch e contextualisescha las mesiras repressivas per motivs da provediment ed ils piazzaments extrafamigliars – ina part impurtanta da l'istorgia sociala svizra.

### **Undrar las promoturas ed ils promoturs dal federalissem**

Il Premi da federalissem dotà cun 10 000 francs undrescha ina persuna u in'organisaziun per ses engaschament politic, civil, scientific u cultural en favur dal federalissem e da la coesiun naziunala. Dapi il 2021 vegn l'appel d'inoltrar candidaturas e nominaziuns publicitgà uffizialmain. Ils dossiers inoltrads vegnan examinads d'ina giuria che sa cumpona da Gülsha Adilji, schurnalista, Markus Dieth (AG), cusseglier da stadi e president da la CdC, Danielle Gagnaux-Morel, chanceliera dal chantun da Friburg, Florence Nater (NE), cussegliera da stadi e presidenta da la Fundaziun ch, Tania Ogay, professuressa al departament per la scienza da l'educaziun e da la furmaziun da l'Universitad da Friburg e Marco Solari, president dal Locarno Film Festival.

Il Premi da federalissem è in'iniziativa da la Fundaziun ch. Gia gudagnà il premi han tranter auter Emil Steinberger, Eva Maria Belser, l'Assemblée interjurassienne, il Circus Knie u il project easyvote.

### **Contact ed infurmaziuns**

Philipp Schori, manader dal sector Fundaziun ch, [p.schori@chstiftung.ch](mailto:p.schori@chstiftung.ch) (031 320 30 14)

Alexander Arens, vicemanader dal sector, [a.arenis@chstiftung.ch](mailto:a.arenis@chstiftung.ch) (031 320 30 05)

### **La Fundaziun ch – ina fundaziun per ils chantuns**

La Fundaziun ch per la collavuraziun federala è in'organisaziun interchantunala dals 26 chantuns. Ella promova la chapientscha tranter las cuminanzas linguisticas e las culturas sco era la collavuraziun dals chantuns tranter pèr e cun la Confederaziun.